

# FURLAN E IPERFURLAN (O FURLAN IPERPÜR)

di Sandri Carrozzo

## 1. Definizion di iperfurlan o furlan iperpür

In chest scrit, par iperfurlan o furlan iperpür, si intint un model di lenghe furlane li che i caratars tipics distintifs dal furlan (e cheste distinzion e vùl jessi soredut intal confront cu la lenghe taliane) a vegnin esagjerâts e metûts in vore ancje li che di regule no varessin di jessi, e duncje no son naturâi, o a vegnin slargjâts li che no son mai stâts o no son plui, cundut che une evoluzion etimologiche regolâr e varès podût acetâju.

Cui che al prodûs modei di iperfurlan si fisse pal solit tai elements fonetics dal lessic, ma a son ancje câs di intervent te sintassi.

Pal solit, cun formis linguistichis di cheste sorte, si cîr di slontanâ plui che si pues il furlan dal talian, ma dispès il risultât al è chel di slontanâ il furlan di se stes e dai furlans.

I fenomens plui abusâts tal furlan iperpür a son alore, juste ben par vie che par talian no son:

- slungjament des vocâls li che no si è produsût, es. *avocât* invezit di *avocat*;
- diftongazion inaturâl in silabe atone, es. *scuelastic* invezit di *scolastic*;
- palatalizazion des velârs li che no si è produsude, es. *scjarpe* invezit di *scarpe*.

Cun di plui a son rielaborazions des peraulis che dispès a van daûr di trê sistemis contraris, aplicâts mo un mo chel altri, la plui part des voltis lant daûr dal criteri unic de difference plui grande che si pues dal talian:

- recuper di peraulis in formis antighis aromai sparidis dal ûs regolâr, es. *contrâr* invezit di *contrari*;
- etimologjie pseudopolâr, es. *fevelament* invezit di *parlament*;
- etimologjie culte o imitazion di modei forescj diferents dal talian, es. *constituzion* invezit di *costituzion*.

In sistemis di cheste sorte al è clâr che, se za te lenghe vive a son plui formis, in gjenar la sielte tra plui variantis de stesse peraule si le puartarà indevant no daûr de coherence cul sisteme linguistic che si ten di base (lenghe di riferiment o varietât), ma ben daûr dal criteri de difference dal talian. Cussì in tescj scrits pal rest te coinè si cjate formis tant che *crompâ* invezit di *comprâ*, o *puisie* invezit di *poesie*: chestis formis a son coretis, ma a son tipichis di ciertis varietâts e no de coinè.

Cundut che chescj caratars a son avonde gjenerâi tai modei iperpuristics si à di vê iniment che no si pues gjeneralizâ e che ogni autôr o operadôr linguistic che al vedi inventât o cjapât sù un model di cheste sorte al à ciatât un so ecuilibri, o disecuilibri, personal, diferent di chei altris: in cualchidun si pues ricognossi ordin e coherence, altris a son plui curiôs e imprevedibii.

## 2. Storie curte dal iperfurlan

Prin di tacâ cuntune piçule analisi de storie dal iperfurlan si à di dî che e je ancje une "preistorie" dal iperfurlan: di fat formis linguistichis ipercaraterizadis a son stadis dopradis za secui indaûr te leterature furlane, e a son ladis indevant in cheste funzion fin in dî di vuê, ma cuntun principi ben precîs, chel di otignî une lenghe comiche o volgâr. Di prin esempli, che al rive di fûr de produzion leterarie furlane, si pues ciatâ une figure pardabon innomenade, Dante Alighieri, che tal bolâ il furlan tant che lenghe barbare e ruspie al cite la frase interrogative *ces fas tu*, li che al zonte un esse tal pronon ce, par vie che il furlan al à di tipic, par une orele taliane, la frecuence di esse final.

In ogni câs i prins pas dal iperfurlan vêr, intindût tant che model seri e cussient a son dal secul XX e pardabon fintremai l'ultin tierç dal secul si pues ciatâ dome che fenomens une vore isolâts.

Tal 1929 Luigi Rodaro, che si firme V.G. Blanch, al publiche il test *Linguaggio Friulano*, une opare che e va cuintrî des propuestis ortografichis de Societât Filologiche Furlane di chê volte, che

pardabon a jerin insuficientis par une scriture pratiche de lenghe furlane stant che la filosofie e jere anjemò chê di "scrivere il friulano da italiani".

Cussì Rodaro al cîr frontâ i problemis di une manciance di une grafie unitarie e di une lenghe di riferiment codificade proponint un sisteme di normis che a vuelin rindi plui regolâr chê che e ven definide la "lenghe naturâl". Tal Rodaro si fasin viodi tra i prins câs di elements iperpuriscj, avonde isolâts ma une vore interessants: cun dut achel l'intindiment nol è anjemò chel di dislontanâ il furlan dal talian, si ben chel di obleâlu a une coherence inventade e scorete. Compagn di chel che al sucedarà plui indevant a altris che a proponaran modei iperfurlans a mancjin lis cognossincis e lis competencis par puartâ indevant une analisi e une normazion de lenghe furlane corete e coerente.

La lenghe di base di Rodaro e je in efiets avonde buine e ecuilibrade, fondade su di une coinè cun desinencis in *-es* (al aceté la pronuncie in *-is* te lenghe fevelade tant che forme dialetâl, i siei tescj a àn un nível di coretece bon, ancie se ca e là, massime te onomastiche, a son formis cjapadis dal talian cence adataments. Tra i elements iperpuristics plui interessants si pues citâ *fugolâr*, tal puest di *fogolâr*, par analogie cun *fûc*: al è ignorât il fat che in *fûc* e je la vocal *u* dome par vie che e je toniche e in posizion di slungjament, e che impen al è naturâl e just ciatâ o in posizion pretoniche.

Al ven doprât ancie *atorn* tal puest di *ator*, tornant a zontâ un *-n* final che al è etimologic, ma che al è contrari ae semplificazion gjenerâl dal sisteme furlan.

Il câs plui seri di iperpurisim al tocje la morfologije, li che par ignorance nol ven ricognossût il plurâl masculin in *-cj* e, par esempli, invezit di *dincj*, *ducj*, *grancj*, *tancj* Rodaro al scrif *dints*, *duts*, *grands*, *tants*.

Di ce che al somee l'esperiment di *Linguaggio friulano* al finis daurman cence vê influence sui scritôrs furlans e l'unic efet al è salacor une critiche tremende di Zuan Lurinçon, che dîs agns prime al jere stât il prin president de Societât Filologiche Furlane. Lurinçon al pubbliche su "Ce Fastu?" une curte segnalazion che e piture cence dûl la realtât des propuestis linguistichis di Rodaro: "Tolti i versi friulani, che però, essendo scritti da tal zelatore della purità del linguaggio, dovrebbero essere liberati dai tanti italianismi che vi si riscontrano, questo libro è un crescendo di bestialità che non vale la pena di confutare".

Disfredant i tiermins dal judizi si pues dal sigûr jessi dacuardi cul Lurinçon, ma si à ancie di scusâ il Rodaro che, cun buine volontât ma cence preparazion, si moveve intal cjamp de gramatiche furlane, che anjemò nol jere stât ben esplorât e sclarît.

Par fortune i studis di linguistiche furlane tal secul XX a van indevant e tal 1952 pre Josef Marchet al pubbliche cu la Societât Filologiche Furlane i *Lineamenti di grammatica friulana*, une opare capitâl te storie dai studis su la lenghe furlane, che e prove la competence dal autôr e la sô intuizion e sensibilitât ancie li che no si môf sul sigûr: cundut che ciertis tesis dal Marchet, massime su la etimologije, a vedin fai e che la grafie doprade, rignuvide e no plui chê de prime Filologiche, no sedi anjemò suficiente par rapresentâ cun coherence il furlan, la publicazion di cheste opare e di altris studis ur gjava ai iperpuriscj che a vignaran dopo cqualsiasi justificazion di manciance di struments e di metodologije di analisi de lenghe furlane.

Cun dut achel tai agns Setante dal secul XX si viôt a nassi pardabon fenomens articolâts di iperpurisim furlan: un tant al pues maraveâ, massime se si pense che aromai a son ben salts e sigûrs i esemplis di produzion leterarie e di codificazion linguistiche intun furlan leterari avonde omogjeni, dispès pûr e une vore biel (che si pensi di gnûf a Josef Marchet e ai nons straordenaris di Risultive, ae sperimentazion ancie tal cjamp de comunicazion de prime "Patrie dal Friûl" e a tancj altris autôrs).

Par sclarî la nassite dal iperpurisim furlan si pues provâ a individuâ lis resons principâls tal moment storic e politic dai agns Setante:

- la percezion de menace de lenghe taliene cuntri de lenghe furlane e devente simpri plui clare e la difese de lenghe furlane e tache a sei ancie un pont impuant e incrosât dal confront politic;
- e mancie la pussibilitât di studiâ il furlan te scuele e i efiets de contaminazion che e diven dal contat cu la lenghe taliene si tache a sintiû fintremai tai militants a pro dal furlan;

- al manje un rapuart produtif tra la societât e l'inteletuâl militant, che si sint isolât intun desert li che l'impartant al è fâ alc: cemût fâlu al pues deventâ secondari stant che ognidun al è convint che no si fasi nuie, o scuasi, e che in ogni câs nissun altri nol vedi tantis competencis;
- e manje une autoritât o un pont di riferiment autorevul di model e di control de lenghe furlane.

In cheste clime, simpri plui scjaldade des justis rivendicacions politichis furlanistis, ma anche simpri plui frustrade des injustiziis dal sisteme centrâl e simpri plui dividude, e cres une forme "adolessenziâl" di metisi in rapuart cu la lenghe taliane: tant che un fantat che al cjale i grancj e che al fâs il contrari dome par oposizion, cence pensâ se al è just o no, il militant iperpurist al cjale la lenghe taliane e al sielç simpri la forme plui lontane.

In cualchi câs il confront cul talian al è anche l'unic possibil pal iperpurist che, compagn che la plui part dai furlans, al è bon di doprâ in maniere tecniche e di analizâ cun buine competence dome la lenghe dal stât e alore al reagjis par oposizion. In altris câs e je la competence anche in altris lenghis, massime tal francês, che cualchi volte al è cjapât di model, ma e manje la capacitat di imparâtâ lis competencis linguistichis di analisi rigorose cuant che si à di fâ cul furlan.

L'iperpurism tai agns Setante e Otante, cun codis che a van indevant fin in dì di vuê, al cjate in plui des resons sociâls anche resons concretis plui puntuâls e specifichis, e volte par volte al cjape formis o proporzions differentis.

### **L'iperpurism di Gianni Nazzi e Giorgio Faggin**

Pocjis voltis si pues individuâ un program iperpurist razionâl e planificât, in gjenar ispirât o messedât cuntun ideâl politic: si pues fevelâ in chest câs di Gianni Nazzi e Giorgio Faggin. Gianni Nazzi, vuê professôr in pension di francês, dai agns Setante incà al è autôr di gramaticchis, dizionario, traduzions e altris publicacions, al è stât par pôc timp anche president dal Moviment Friûl e al è une persone des plui ativis te produzion sul furlan e/o par furlan, ma anche tra lis plui ledrosis devant di cualsisei forme di colaborazion. Tal lessic e te sintassi il so iperpurism si fonde suntune base salde di coinè furlane, cognossude une vore ben, li che par cuintrî si insedin elements incoerents che a vuelin dislontanâsi di someancis cul talian. In particolâr Nazzi si poie volte par volte su fondis popolârs, ma che no son in armonie cul rest dal sisteme linguistic de coinè, su testemoneancis leterariis proponudis come formis normâls, anche se gjavadis di contescj comics o sperimentâi, o su modei forescj, massime francês.

Il model linguistic di Nazzi al è madressût e deventât plui coherent anche in gracie dal contat cun Giorgio Faggin, studiôs di storie da la art, ladinhist e autôr dal prin grant dizionario de lenghe furlane dopo dal *Nuovo Pirona*. Te jentrade dal dizionario, il Faggin al motive cualchidun dai principis che lu àn ispirât: a son dentri anche il purism fondât su testemoneancis popolârs e leterariis e il confront favorit cul francês. Des sieltis puristichis di Faggin, che al vûl proponi un furlan coret e normatif, une buine part a son di acetâ dal sigûr, altris impen a finissin par jessi iperpuristis: par esempi al declare la eliminazion di formis suspectis tant che il verp *disamorâ*, propit par vie che tal francês no cjatin une corrispondence, o si cjape formis poetichis di pre Zaneto, tipichis di poesiis comichis, e si lis gjave dal contest insegnantlis tant che formis di riferiment par cualsisei regjistri (aromai famôs il câs di *codac* par *machine fotografiche* che al è finit tant che soluzion uniche in cualchi dizionario di Nazzi).

Par ce che al tocje la fonetiche l'aspett plui clâr di iperpurism al è la propueste, tant che forme primarie e dispès uniche, des formis lessicâls li che si conserve *-n-* tra prefis e teme de peraule. A son esemplis *instituzion*, *instruzion*, regjistrâts za dal *Nuovo Pirona* cun dongje lis formis, in dì di vuê une vore plui dopradis, *istituzion* e *istruzion*: se pal sufis *in-* la sielte e je justificate almancul di modei che a jerin za prime, il tratament di *con-* al è fûr dal compuartament naturâl dal furlan. Faggin al propos tant che unichis lis formis tant che *construî*, *constance*, *constituî* invezit di *costruî*, *costance* e *costituî* e la sielte di recuperâ *-n-* e je arbitrarie. Tal furlan di fat a son plui testemoneancis che a dimostrin che il prefis *con-*, different dal prefis *in-*, devant di grup consonantic che al tache cun esse, al piert simpri la nasâl e duncje tornâle a meti al svicinje il furlan al originâl etimologic e a altris lenghis neolatinis, ma par slontanâlu dal talian lu slontane anche di se stes.

Lis oparis di Nazzi, e in part di Faggin, tal complès, a son lis propuestis iperfurlanis plui sistematichis.

## **Elements iperpuristics tal stîl “popolâr”**

Dispès elements iperpuristics isolâts si son insedâts intun tiessût espressif di lenghe che al voleve jessi popolâr e a comparivin soredu tant che soluzions par fâ neologjisims in autonomie, ma si cjatin dongje di formis talianis arudis acetadis cence pinsîrs par vie che “la int e dîs cussì”, cence lâ a viodi se la expression de int e jere pardabon naturâl o ben sfuarçade di une pression o oppression linguistiches: esemplis di cheste sorte si cjatin tai scrits di plui autôrs, ancje une vore impuantants, tant che pre Pieri Piçul o pre Checo Placerean. La forme expressive di chescj autôrs e je fondade pal solit suntune grande cognossince e capacitat di doprâ la expression spontanie de lenghe fevelade e su la volontât di puartâle te lenghe scrite. La fuarce comunicative di chescj scritôrs e je dal sigûr straordenarie e tancj letôrs a calcolin scuasi che e sedi la uniche forme stilistiche pardabon furlane, viodût che ancje par argoments tecnics o di nivel culturâl o politic alt a mantegnin un regjistri popolâr, daûr di chel che nol jere dome un intindiment stilistic, ma ancje politic. In tescj di cheste fate si pues cjatâ peraulis talianis tant che *regno*, cuant che al pararès miôr *ream*, o *verbo*, che intun contest religjôs al è fintremai falât, ereditât taliane scorete dal latin *verbum*, che al voltave il grêc λόγος e che al cjatarès une expression furlane une vore miôr cun *peraule*; di chê altre bande, e dongje di chestis formis, a son invenzions pseudopopolârs tant che *glesiastic* o *gleseastic*, invezit di *eclesiastic*, o fintremai *fevelament* tal puest di *parlament*. Cun esperimenti di cheste sorte si leve daûr de idee di svinçâ un furlan cult a chel de int, ma si inventavin formis che la int no veve mai pensât di doprâ, che in cualchi câs e fasève fadie a capî, che a podevin tornâ ridiculous o che si proponevin dibant in alternative a formis furlanis coretis e za dopradis de int.

### **3. Elements dal iperfurlan te produzion scrite dal dì di vuê**

Te reallât di vuê a son câs, aromai simpri plui isolâts, di operadôrs che a àn cjapât sù dal biel principi o che a àn fintremai fondât modei di iperfurlan, che a van indevant a scrivi te lôr maniere, ma che, ancje par resons anagrafichis, a son simpri mancul atîfs te produzion di tescj. La figure plui di rivuart in chest cjamp e je dal sigûr chê di Gianni Nazzi che aromai al ten l'iperpurisim tant che simbul di une bataie individualiste, che e cjate expression prin di dut tal ûs anacronistic de grafie proponude tai agns Otante di Giorgio Faggin, doprade aromai nome che di Nazzi.

In altris câs elements iperfurlans a restin soredu tant che imitazion di modei cjapâts sù in maniere plui o mancul cussiente. I câs plui clârs si cjatin tai scrits gjornalistics e si ripuarte chi doi esemplis, di cualchi an indaûr.

### **L'iperfurlan come forme di contestazion**

Tra i câs di aplicazion plui moderne di elements iperfurlans un di chei plui interessants al è chel dal mensîl “La Patrie dal Friûl”, che in dut câs dal Istât dal 2006 e à mudât compuartament: la base linguistiches e jere la coinè e si doprave in maniere sistematiche la grafie uficiâl (salacor ancje par vie che, come che al è just, e je cundizion par otignî finanziaments regionâi), ma, in maniere ancje chê sistematiche, ciertis regulis ortografichis determinadis, par dî une la norme sul ûs dal apostrof, no vignivin rispietadis e si fasève il contrari di ce che al jere prescrit de leç 15/96 e des sôs modificazions seguitivis. Dal control formâl e de cure testuâl che a caraterizin “La Patrie dal Friûl” si capis che cheste azion no jere casuâl, ma ben e rispuindeve a une logiche di contestazion cussiente de normalizazion linguistiches puartade indevant in particolâr dal OLF. Duncje di une bande si cjapavin lis risorsis finanziariis metudis a disposizion de region par poiâ la lenghe furlane, di chê altre bande si doprave juste chês risorsis par fâ cuintri, tai contignûts e ancje tes formis, ai intindiments regionâi su la lenghe furlane: in cheste clime no je une sorprese che “La Patrie dal Friûl” e vedi dât grande difusion al ultin dizionari di Gianni Nazzi (che al è ancje pari di un dai redatôrs plui atîfs de riviste) e che no ves nancje dât la notizie de publicazion, daûr di un projet regionâl, dal dizionari dal CFL2000 (in compens a jerin stadis acetadis letaris che lu atacavin).

Tant che esempli linguistic si pues viodi il toc di un articul publicât tal numar di Març dal 2005, li che a son evidenziadis in grues e cuntune linie sot lis formis ortografichis contrariis ae grafie uficiâl e in grues e in corsif lis formis iperfurlanis.

L'euro nol **circulave** ancjemò, ai 14 di Decembar dal 2001, cuant che a Laeken, dongje Bruxelles, i sorestants continentâi a an metût in cantîr un altri "sium": la **Constituzion** de "Union europeane". In chê dì e je stade inviade la "Convenzion", pressedude dal francês Valery Giscard D'Estaing, cun vicjaris il talian Giuliano Amato e il belgic Jean-Luc Dehaene, par preparâ la riforme dentri dal mês di Jugn dal 2003. La fuarce d'Europe e je simpri stade la brame di cognossi, di supâ e di cjapâ sù esperiencis e valôrs di altris civiltâts, che intune cu la passion di fâ e il fidâsi di se, a an puartât ae valorizazion de sô vite. Cussì ancje in cheste occasio si scrupule **ch'e** studiarà e **ch'e** tegnarà in considerazion ogni bon esempli, propueste e indicazion. Ma no par copiâ un model cualunche di **convivince**. Se l'Europe e volarà fâ part responsabilmentri di un gnuâ ecuilibri internazionâl di pâs e di svilup no podarà contentâsi di modernizâ il vecjo, copiant o adatant modei. Si ben e varà bisugne di un "sium", di un'idee, di un'aspirazion di realizâ, cun qualitât. E varà di creâ une **Constituzion** buine pes etis a vignî. Un **stroment** viert e avanzât **ch'al** permeti une politiche vivarose e inovative, cence cori il risc di pierdi, cu la democrazie, ancje la libertât e la dignitât. Al **contrâr** dai Stâts Unîts d'Americhe, che prin a an fate la federazion politiche e daspò a an pensât al dolar, i europeans a son partîts facil cul euro e a finissaran cu la dificil union politiche.

...

Come che si pues viodi, tal complès la espression linguistiches e je di qualitât avonde alte e curade, ma in maniere sistematiche si va cuntri des regulis sul apostrof e di chê de acentazion di àn.

Si pues viodi câs par câs lis formis iperfurlanis:

*circulave* tal puest di *circolave*, al è dal sigûr une forme secondarie che, dome par slontanâsi dal talian in chest câs svicinantsi al latin, no ten cont dal compuartament tipic dal furlan di sbassâ *u*, a ben che etimologic, in *o* in posizion pretoniche: se si les daûr di chest compuartament si varès di vê \**cjossulâ* invezit di *cjossolâ*;

*constituzion* tal puest di *costituzion* al cjape un model che al è comun in altris lenghis europeanis, ma che pe fonetiche furlane al è pardabon inatural: il tiermin *costituzion* al è citât za tal Nuovo Pirona, cence cirî plui indaûr, e impen no je nissune peraule furlane li che si conservi *-n-* intun disvilup dal prefis *con-* cun daûr un grup consonantic che al tachi cun esse (*costance* e no \**constantce*, *costrut* e no \**construt...*);

*convivince* tal puest di *convivence* al slargje la jevade di *e-* derivât di Ě in *i-* prime di un grup consonantic che al tache cun *n*, tant che intal sufis *-ince/-ence*: la forme *-ince* e je un element che si cjate in diviersis peraulis furlanis patrimoniâls (es. *cognossince*, *crodinge*, *presince*), ma in altris câs no si cjate o si cjate in alternance cun *-ence*, massime tes peraulis resintis; il slargjament di cheste forme li che no je tradizionâl e je tipiche dal iperfurlan e e varès di puartâ ancje a formis tant che \**assistince* tal puest di *assistance* o \**presidince* tal puest di *presidence*, \**cussince* tal puest di *cussience* e v.i.;

*stroment* tal puest di *strument*, al è une forme testemoneade in cualchi varietât di furlan, ma dal sigûr e je secondarie e une vore mancul doprade dai furlans, che e ven sielzude culi dome par vie che e je plui lontane dal talian *strumento*.

### **L'iperfurlan come forme di comeponsazion**

In altris autôrs o in altris mieçs di informazion la presince di formis iperfurlanis e somee plui casuâl e fintremai si pues pensâ che e funzioni tai elements lessicâi par une cierte compensazion de contaminazion linguistiche taliane che e tocje chei altris aspiets. Al vignarès a stâi che l'autôr o il revisôr dai tescj, visantsi che la espression scrite tal sô complès e va daûr di un model talian, al meti dentri elements no dome furlans, ma ben iperfurlans, nancje che in cheste maniere si podès "tirâ sù la medie di furlanetât" dal test. Tant che esempli si pues cjalâ un articul publicât tal mês di Fevrâr dal 2005 di intun portâl di informazion par furlan: chi si segne in grues e cuntune linie sot lis expressions

che a van plui daûr dal model dal lengaç gjornalistic talian (che pardabon al è fuart ancje in formis no evidenziadis), in grues e in corsîf lis formis iperfurlanis.

28/02/2005 - Pardabon buinis gnovis pai grups minoritaris che a vivin in Crauazie. Il Consei ***gubiernatîf*** pes minorancis di Zagabrie al à spartît i fonts di belanç pal 2005, che in dut ***a somin*** 24 millions 500 mil kunis, ven a stâi trê millions 300 mil euros. Rispiet al an passât si è vude une in crescrite dal dîs par cent. I stanziaments a van daûr de consistenze numeriche di ogni grup minoritari, ancje se no in maniere proporzionali. Seont chest criteri, la fete plui grande e je lade ae minorance serbe, che si è sigurade sîs millions 400 mil kunis (860 mil euros). ***Al*** secont puest la minorance italiane, cun cinc millions centmil kunis (690 mil euros), ***pari al*** 21% dal totâl; scusat mieç milion di kunis in plui rispiet al 2004. ***Chesci, scomençant dal plui consistent, i stanziaments pes altris minorancis:*** onjarêts 2,7 millions di kunis, cecs 2,4 millions, rom 1,2 millions, slovacs, rutens e ucrains un milion par om, bosgnacs 850 mil, albanes 559 mil, macedons, slovens e montenegrins 500 mil par om, todescs e austriacs (che a vegnî considerâts un unic grup minoritari) e ebreus 470 mil par om, bulgars 48 mil, polacs 37 mil, rus 32 mil. La in crescrite dai fonts riservâts a lis minorancis e fâs part dal program dal guvier di centridrete presiedût dal premier Ivo Sanader, in cjarie di pôc plui di un an. Il Consei pes minorancis ***al à po fat*** bon il rapuert presentât de radiotelevision nazional HRT rivuart al progetto pe preparazion professional di gjornaliscj membris des minorancis. In curt, siet candidâts a saran assumûts de HRT tant che ***colavoradôrs***. ***E je ancjemò lontane però*** la possibilât pes minorancis di vê ***propis spazis*** di puartâ indenant in maniere autonome dentri dai programs de radiotelevision di stât.

In chest test si puest notâ che la cualât de lenghe furlane e je avonde basse e che e je une pression une vore fuarte di un model gjornalistic talian, fat di formulis stereotipadis e di espressions che a vuelin vê un ciert efet comunicatîf, ma che aromai a sunin strachis za par talian e che par furlan a son in naturâls e a dan une impression gjenerâl di lenghe intalianade. I câs di iperfurlanism a son:

*gubiernatîf*, impen di *governatîf*, al è pardabon une crezion singolâr, di une bande si torne al *-b-* dal latin *gubernum* e duncje si fâs un cultisim, di chê altre bande si slargje la diftongazion di Ě in *-ie*, che al è un volgarisim, come che si cjate in *guvier*, ma si metile in vore in posizion atone, li che par furlan no varès di funzionâ.

*colavoradôr*, impen di *colaboradôr*, al met in vore il procediment contrari, in chel che al sarès un neologisim di adatament diret dal latin si passe dal *-b-* latin al *-v-* furlan, compagn che si cjate in lavorâ.

Chi si puest viodi une vore clare la incoherence di chest model iperfurlan: parcè si aial di vê *guyier* e *gubiernatîf* di une bande e *lavorâ* e *colavoradôr* di chê altre? Anticipant o confermant che in ogni câs lis formis coretis a son *governatîf* e *colaboradôr*, si puest cjalâ la tabele ca sot par capâ la logjiche de sielte iperfurlane.

latin	GUBĚRNU(M)	GUBERNATIVU(M)
portughês	<i>governo</i>	<i>governativo, (governamental)</i>
castilian	<i>gobierno</i>	<i>gubernativo, (gubernamental)</i>
catalan	<i>govern</i>	<i>governatiu, (governamental)</i>
francês	<i>-, gouvernement</i>	<i>-, gouvernemental</i>
rumen	<i>guvern</i>	<i>guvernativ, (guvernamental)</i>
talian	<i>governo</i>	<i>governativo</i>
iperfurlan	<i>guvier</i>	<b><i>gubiernatîf</i></b>
furlan	<i>guvier</i>	<i>governatîf</i>

LABORARE	*COLLABORATORE(M)
<i>trabalhar (lavrar)</i>	<i>colaborador</i>
<i>trabajar (labrar)</i>	<i>colaborador</i>
<i>treballar (llaurar)</i>	<i>col.laborador</i>
<i>travailler (labourer)</i>	<i>collaborateur</i>
<i>-, a lucra</i>	<i>colaborator</i>
<i>lavorare</i>	<i>collaboratore</i>
<i>lavorâ</i>	<b><i>colavoradôr</i></b>
<i>lavorâ</i>	<i>colaboradôr</i>

De comparazion si viôt che il tratament di *-b-* etimologic dal iperfurlan nol cjate nissun paralêl cun nissune altre lenghe: gjavant il fat che la plui part di chês altris lengthis e doperre tant che forme plui normâl adataments dal francês *gouvernemental*, e che dispès il derivât dal latin LABORARE al è restât dome tant che tiermin agricul par dî “arâ”, si pues notâ che tal câs dai corispetifs di *guvier* e *governatif* si cjate simpri la stesse consonante tal sostantif e tal adietif; tai câs di *colaboradôr* invezit, si cjate simpri *-b-*, stant che al è un neologisim che nol à une relazion direte cui corispetifs di *lavorâ* (se di no o varessin un talian \**collaboratore*, un teoric castilian \**cotrabajador*, e v.i.). Duncje al risulte che la uniche relazion dal iperfurlan e je cu la lenghe taliane: in mût avonde sempliç si cjale ce consonante tra *-v-* e *-b-* che al à il talian tai neologisims e si sielç il contrari, ancje se in cheste maniere si slontane il furlan di dutis chês altris lengthis e soredut de sô nature. Ancjemò al è di rimarcâ che chestis a son pardabon invenzions di fantasie e che nancje in repertoris che a tegnin dispès une linie iperpuriste, tant che i dizionaris di Nazzi o di Faggin, no si cjatin formis dal gjenar, ma ben, almancul par chest câs, si va daûr dal compuartament normâl de lenghe.

#### 4. Tiermins iperfurlans esemplârs

La comparazion cu la origjin etimologjiche antighe o moderne e cun chês altris lengthis, massime neolatinis, al è il prin imprest che al permet di ricognossi la strambetât di propuestis iperpuristis: cuntun tant no si vûl ni condanâ cui che lis à inventadis ni cui che, cjapant di altris modei, lis à dopradis, ma ben si vûl dimostrâ che in dì di vuê no àn plui nissune reson e che proponilis o difindilis tant che patrimoni linguistic nol à mani.

##### 4.a scolastic o scuelastic?

latin	SCHÖLA(M)	SCHOLÄRE(M)	SCHOLASTICU(M)
portughês	escola	escolar	(escolástico)
castilian	escuela	(escolar)	(escolástico)
catalan	escola	(escolar, escolà)	(escolàstic)
francês	école	écolier, (scolaire)	(scolistique)
rumen	școală	-	(școlastic)
talian	scuola	scolaro	scolastico
iperfurlan	scuele	scuelâr	<b>scuelastic</b>
furlan	scuele	scuelâr	scolastic
inglês	school	(scholar)	(scholastic)

Par precision si à di dî che in cualchi lenghe i derivâts di SCHOLÄRE(M) a àn origjinât pal plui adietif ecuivalents a “de scuele” e che invezit i derivâts di SCHOLASTICU(M) a son restâts soredut tant che tiermin filosofic. Cun dut achel i esemplis atornin bogns pal confront etimologic: par rivâ al iperfurlan *scuelastic*, forme falade par *scolastic*, no dome si lu fâs partî di *scuele*, cuant che in dutis chês altris lengthis si partîs drets dal latin *scholasticum*, ma ben si met in vore une diftongazion inatural in posizion atone: se si ves di aplicâ une regule di cheste sorte tal castilian si varès di vê \**escuelastico*, par talian \**scuolastico*, par rumen \**școalastic* e magari par inglês \**schoolastic*.

#### 4.b *linguistic* o *lenghistic*?

latin	LÍNGUA(M)	-	*LINGUISTÍCU(M)
portughês	<i>língua</i>	<i>linguagem</i>	<i>linguístico</i>
castilian	<i>lengua</i>	<i>lenguaje</i>	<i>linguístico</i>
catalan	<i>llengua</i>	<i>llenguatge</i>	<i>lingüistic</i>
francês	<i>langue</i>	<i>language</i>	<i>linguistique</i>
rumen	<i>limbă</i>	<i>limbaj</i>	<i>lingvistic</i>
inglês	-	<i>language</i>	<i>linguistic</i>
talian	<i>lingua</i>	<i>linguaggio</i>	<i>linguistico</i>
iperfurlan	<i>lenghe</i>	<i>lengaç</i>	<b><i>lenghistic</i></b>
furlan	<i>lenghe</i>	<i>lengaç</i>	<i>linguistic</i>

*Lenghistic*, forme falade par *linguistic*, al è un dai tiermins iperfurlans plui difondûts e stant che si è slargjât intun ambient militant e te suaze des rivendicazions justis puartadis indevant tal cjamp *linguistic* (!), al è doprât in cualchi câs ancie di cui che pal rest nol cjape nissune magle de stesse sorte: al è curiôs notâ che chei stes che a sostegn la coretece di *lenghistic* e che a bolin *linguistic* tant che forme taliane a ricognossin la autoritât fûr di discussion di Josef Marchet (magari i dedichin studis o fintremai a zontin il so non a chel di dipartiments universitaris), ma no pierdin timp a lei ce che al scriveve di *linguistiche* (!) prime des invenzions iperfurlanis. Dal scheme si note che il resonament che al fâs nassi cheste forme falade al va propit daûr dal talian, stant che si resone par talian cuant che si pense che *linguistico* al vegni di *lingua* e che alore la peraule furlane si à di fâle vignî di *lenghe*: se al fos cussì par francês si varès di ciatâ \**linguistique*, par catalan \**llenguistic*, par castilian \**lenguístico*, par rumen \**limbistic* e v.i.; invezit al è clâr che i corispetîfs di *linguistic* a son neologjisims in dutis lis lenghis e che a derivin no dal corispetîf di *lenghe*, ma ben a vegnin drets di \*LINGUISTICU(M).

#### 4.c *parlament* o *fevelament*?

latin	PARABOLARE	FABULARE	-
portughês	-	<i>falar</i>	<i>parlamento</i>
francês	<i>parler</i>	-	<i>parlament</i>
catalan	<i>parlar</i>	-	<i>parlament</i>
castilian	-	<i>hablar</i>	<i>parlamento</i>
rumen	<i>a barburi</i>	-	<i>parlament</i>
inglês	-	-	<i>parliament</i>
talian	<i>parlare</i>	-	<i>parlamento</i>
iperfurlan	-	<i>fevelâ</i>	<i>fevelament</i>
furlan	-	<i>fevelâ</i>	<i>parlament</i>

La invenzion di *fevelament* e je pardabon straordenarie, stant che il Parlament de Patrie dal Friûl al è une des istituzions plui gloriose de nestre storie e che des primis testemoneancis furlanis al comparîs tant che *parlament*, vocabul internazionâl salacor di derivazion francese medieval, e che mai nissun furlan nol veve pensât di clamâlu *fevelament* (e alore parcè di no *cjacarament* o *tabaiament*?). La robe ancjemò plui straordenarie e je di ciatâ inmò in dì di vuê personis che, ancie se no doprin cheste peraule, a disin e a scrivin che e sarès la forme corete. Compagn di *lenghistic*, *fevelament* al dimostre che cui che al difint cheste invenzion al pense par talian, croidint che *parlament* al vegni dal talian *parlare*: se al fos cussì il castilian al varès di vê la forme \**hablemento*, il portughês *falamento*, il rumen \**barburiment*. Par fortune chest al reste un câs curiôs di pocjis testemoneancis scritis.

## 5. Gnovis aplicazions pussibilis dal sisteme iperfurlan

Par rindisi cont dai efiets che a podaressin vignî di certis posizions che a sostegnin l'iperfurlan, si pues aplicâ cun coherence lis regulis semplicis che o vin viodût fin cumò, e capî che cualsisei furlan al cjatarès une lenghe di chê sorte ridicule e no furlane.

furlan	iperfurlan
biscot	biscuet
dentist	dintist
eletrodomestic	eletrodumiesti, eletromugnestrî
frico	fric
informatic	informadi
maxilofaciâl	gramulomusâl
ocjâi	voglârs
patriarcje	pariarcje
turist	atorist

## 6. E a fâ l'ipertalian?

La mancance di fonde des posizions di cui che inmò in dì di vuê al propon formis iperfurlanis si dimostre cu la acetazion passive dal talian cemût che al è: dut al contrari al podarès jessi interessant slargjâ al talian chei stes procediments che si à voie di meti in vore sul furlan e sui furlans. In coherence cui principis iperpuriscj, che però cumò si fasaran rispuindi aes regulis dal talian, si podarès otignî l'ipertalian.

talian	ipertalian
articolo	articchio
binocolo	binocchio
celeste	cieleste
Claudio	Chiodio
feroce	fieroce
matriarcale	madriarcale
rotondo	ruotondo
scolastico	scuolastico

## 7. Conclusions

Cjalant altris lenghis minorizadis, e ancje cualchidune maioritarie, si viôt che la plui part e je passade par une fase iperpuriste: dal sigûr no je une colpe di cui che al à inventât sistemis dal gjenar par esaltâ diferencis e contrascj, ma ben al è un efet di certis situazions sociopolitichis, che in Friûl a son finidis e che in ducj i câs il furlan al pues lassâ indaûr.

Ai furlans ur covente une lenghe di riferiment cun regulis che a rispietin il compuartament natural de lenghe e no che a esaltin cualchi aspet superficiâl par deformâle in maniere arbitrarie e disecuilibrade.

La lenghe furlane e à bisugne di normis di riferiment precisis, ma articoladis e no aprossimativis, e nancje inventadis in moments di emergjence di cui che al à vût il merit straordenari di puartâ indevant ideâi juscj, ma che nol veve la pussibilitât di individuâ cun serenitât lis regulis che a coventin vuê par formâ peraulis gnovis o par sielzi cun coherence tra plui variantis.

Par furlan si à disvilupâ une varietât di regjistris che fin cumò no à podût cressi cun facilitât par vie de cundizion di sumission che e je stade imponude: i modei iperpuriscj pal solit no permetin cheste

cressite e a oblein ancjemò cui che al scrif a doprà o un regjistri popolâr bas o un regjistri liric sublim, magari messedantju cun efiets stilistics e comunicatifs disarmonics e insuficients.

La lenghe furlane e à bisugne di podê jessi insegnade: i modei dal iperfurlan a van cuintri de naturalece de lenghe, a son incoerents e al è impussibil ciatâ il dret de lôr struture, duncje al sarès une vore dificil insegnâju in maniere sistematiche.

La lenghe furlane e je un element di fonde de identitât dai furlans, no si pues acetâ che si le buti in barzalete cun propuestis che no àn nissun costrut.

La oposizion iperpuristiche a un sisteme di riferiment unitari, che in ogni câs nol vûl jessi unic e assolutist, e prodûs dome che confusion e e disturbe il disvilup professional di operadôrs linguistics e ancje e fâs cuintri al dirit dal public dai letôrs di cressi pardabon te cognossince de lenghe furlane.

Di là di chescj fatôrs linguistics e sociolinguistics e je ancje une cuistion politiche: si viôt che formis iperfurlanis a son stadis dopradis in cualchi câs cuintri dal obietif di vê une lenghe furlane normâl, refudant chei che a son stâts i prins esperments di une politiche linguistiche gnove e serie, tacade sul finî dai agns Novante. Prime la leç regionâl 15/96 e po dopo la leç statâl 482/99 a àn metût a disposizion une cierte cuantitât di finanziaments pe tutele e pal disvilup de lenghe furlane, permetint di scomençâ a planificâ in maniere razionâl iniziativis e campagnis di politiche linguistiche: di une bande e je stade une oposizion di cui che al è cuintri di une cualsisei tutele de lenghe furlane, di chê altre bande e je stade ancje la oposizion di cierts "furlaniscj" (pardabon tra virgulutis) che a àn doprât e a doprin ancje modei iperfurlans par gjavâ fuarce ae lenghe di riferiment, par fâ disordin e par meti sù un sisteme li che ricognossi la cualitât linguistiche al sedi impussibil. L'obietif avonde clâr al è chel di une gestion egoistiche e irresponsabile dal podê, grant o misar: in cualchi câs si fâs fente di jessi libertaris o fintremai anarchics ("ognidun al à di jessi libar di scrivi cemût che al vûl!", ma parcè dome par furlan e invezit par inglês, par todesc, par talian o par catalan si aial di rispietâ normis precisis?) e che invezit e je ciniche e prepotente: se e mancje une norme di riferiment e se no son nivei di cualitât clârs, che a lassin libertât di espression e di stîl, ma che a definissin ce che nol è furlan e ce che al è erôr, alore si pues amistrâ lis risorsis economichis destinadis al furlan no daûr di criteris di capacitat e di risultâts, ma ben daûr di criteris di amistât o di invistidure feudâl.